

## Èkwo, Pọlu deru nọ Ndu Fílipayi

<sup>1</sup> Ọ bụ mbèdua, bụ Pọlu; mu lẹ Tímoti, bụ ndu ejeru Kuráýisutu Jisọsu ozi ede èkwo-ozi ọwaa.

Ndu ayi ede iya anụ bụ ndu kẹ Nchileke ono, bu lẹ Fílipayi l'ẹphe ha ono; mbụ ndu ono, ẹphe lẹ Kuráýisutu tųgbaberu buru nanụ ono; mẹ ndu ishi chọchi ẹphe; mẹ ndu ejeru chọchi ẹphe ozi.

<sup>2</sup> Tẹ Nchileke, bụ Nna ayi; mẹ Nnajiufu, bụ Jisọsu Kuráýisutu meeru unu eze-iphe-ọma; mekwaaphu t'unu buru l'ẹhu-agu.

### *Pọlu ekfu anụ Nchileke l'okfu ẹhu ndu Fílipayi*

<sup>3</sup> Mu anọdujephu ekeleru unu Nchileke ono, mu ejeru ozi ono ekele iphe bụ tekenteke, mu ari ọriri unu. <sup>4</sup> Iphe bụ teke mu ekfu anụ Nchileke l'okfu ẹhu unu bẹ mu egudeje ẹhu-ọtsọ-ẹna ekfu anụ iya. <sup>5</sup> Iphe ọbu bụ lẹ keshinu mbọku ono, unu nuru ozi-ọma ono bẹ unu shikpelephu yetataru mu ẹka l'ọrà ozi-ọma ono arara: t'a nųgbaru iya gbururu byeye nta-a. <sup>6</sup> Iphe lanụ, dooru mu ẹnya ọhuma bụ lẹ Nchileke ono, bụ iya bụ onye wataru ome iphe-ọma ono l'ime unu ono e-gudekpelekwa iya phụ ẹge ono jeye teke oomefu iya l'ishi lẹ mbọku ono, Jisọsu Kuráýisutu a-bya ono. <sup>7</sup> Ọ bụ egbe ọriri, mu arijeru unu ndono. Yọ buru iphe gbaru mu l'ememe ndono; keshinu ọphu unu nọ mu l'obu. Okfu l'unu l'unu ha bẹ ayi l'unu tųko gbaru mgba l'eze-iphe-ọma

ono, Nchileke emeru mu lẹ mkpọro-a, mu nọ nta-a; ayi l'unu atụkokwaphu gbaru mgba l'eze-  
 iphe-oma ke ọgbaru ozi-oma ono ọdzori; bya  
 agbakwaruphu mgba l'eze-iphe-oma ke omeje  
 iya t'o shihu ike. <sup>8</sup> Ọ kwa Nchileke bẹ bu onye  
 maru l'ọo oswi-okfu bẹ mu ekfu: l'obu unu l'unu  
 ha du mu. Obu unu ono, du mu nu ono bẹ bukwa  
 l'obu ọphu Kuráýisutu Jisọsu l'onwiya yeru ayi  
 b'o shi.

<sup>9</sup> Iphe mu anọduje ekfu anuru unu Nchileke  
 bu t'o mee t'obu ono, unu yeru ibe unu ono kaje  
 nshinu akaka akaka eje; me t'unu kafia ọmaru  
 Nchileke ọgbodo amaru; unu amakwaruphu  
 iphe gbaru unu l'ememe l'ifu Nchileke; t'o dokota  
 unu ọnya. <sup>10</sup> Ọo ya bu ege unu a-du ike  
 ọtaje iphe du mma; mee; k'ọphu bu: mbọku  
 ono, Kuráýisutu e-kpe ndiphe ikpe ono -rulephu;  
 yoo lewaru l'unu doberu onwunu ọgà; e to  
 duhedu iphe ọo-ta unu uta iya. <sup>11</sup> Yoo lekwaphu  
 l'umere, unu shikpo meta lẹ ndzu unu l'ọ ha  
 bukota umere, vudo nhamunha, shi l'eka Jisọsu  
 Kuráýisutu. Ọ bu umere ono e-me te ndiphe  
 kwabe Nchileke ugvu; jaa ya ajaja.

*Ogude ndzu onye ekoshi la nọ-turu  
 Kuráýisutu ndzu*

<sup>12</sup> Iphe mu eme t'unu maru; unwunna mu; bu  
 l'iphe-a, byakfutaru mu nu-a bẹ gbe kakwaru  
 ome t'ozí-oma ono kafia odzuru mgboko; <sup>13</sup> ke  
 l'iphe bu ndu soja, eche nche lẹ ke onye eze;  
 mewaru iphe bu ndu ọdo bẹ tükowa makotaru  
 nta-a l'ọo okfu lẹ mu ejeru Kuráýisutu ozi b'e  
 gude tya mu mkpọro. <sup>14</sup> Nta-a b'ọ phodukwaru

mẹ iphe bụ ụnwunna, bụ ndu wowaru onwẹphe ye Kuráýisutu l'ẹka l'ẹphe ha; abụru Kuráýisutu ono bẹ ẹphe atụ ume atukobe. Mbụ yọ bụkwaru mkpọro-a, a tūru mu-wa bẹ kparu iya nū. Obu ka ẹphe oshihu ike nta-a; katabe iya; k'ọphu ẹphe kafua ọra ozi-oma ono arara; to nwe onye ẹphe atsu egvu.

<sup>15</sup> A makwaru-a l'o nweru ndu gude ékwò; l'ezi ozi-oma kẹ Kuráýisutu ono l'ọ -bụ iphe, eeme l'okfu. Obenu l'o nwekwaru-a ndu ọphu gude obu iphoro ezi iya. <sup>16</sup> Ndu onanu, gude obu iphoro ezi iya ono bẹ gude kẹ l'ẹphe yeru Kuráýisutu obu; ezi iya. Okfu l'ẹphe maru l'ọo ya bẹ kuru mu nū; tẹ mu bya agbajeru ozi-oma ono ọdzori. <sup>17</sup> Ndu ọphu ezi ozi-oma ono l'ọ -bụ iphe aakpa ẹnya phụ te gudekwa obu iphoro ezi iya. Iphe ẹphe emelephu bụ t'iphe-ẹhuka, mu eje lẹ mkpọro-a, mu nọ-wa gbe karu nshinu.

<sup>18</sup> Ọlobu; ?mu eyeru ẹphe ọnu. Mbụ; ?m'e -gude obu iphoro ekfu iya-o; ?m'ọ bụ l'o nweru iphe nọ ndu ekfu iya nū l'ọkpoma; ẹphe ekfu iya; iphe ọ bụ iphe ọ bụ; t'e kfua ya nū t'e shi ẹge ono mee tẹ okfu ẹhu Kuráýisutu dzuru mgboko. Ọ kwa iphe ono e-me mu; ẹhu atsọ mu ẹna; atsọ iya l'eje. <sup>19</sup> Okfu lẹ mu maru lẹ keshinu ọphu unu anọduje ekfu anụ Nchileke l'okfu ẹhu mu; tẹmanu bẹ Ume kẹ Jisọsu Kuráýisutu anọdujekwaphu eyeru mu ẹka bẹ mu maru l'ee-mekochaa haa mu. <sup>20</sup> L'iphe mu dobekpooru ẹnya; dobeshia ya ike; bụkwaruphu iphe mu ele ẹnya iya bụ l'iphe bụ ẹge ọ dū bẹ mu ta abyadu bya emeru iphe-iphere nū onwomu l'iphe bụ iphe mu eme ememe. Iphe mu e-gbe shia obu

ike l'eme; mbụ l'emekpole iya phụ nta-a ẹge ono, mu shihawa meta iya ono; bụ ị mu e-gude ndzụ mu; kwabẹ Kuráýisutu ugwu; ?m'ọ bụ mu ị ndzụ; ?m'ọ bụ mu l'ọnwu. <sup>21</sup> L'ẹhu nke mu bụkwa: mu -nọdu ndzụ; mu egudenuphu ndzụ mu ekoshi l'ọo Kuráýisutu bẹ mu nọ-turu iya. Teke bụ l'ọo anwuhu bẹ mu nwuhuru bẹ gbe bụkwaru uru gbaaru mu. <sup>22</sup> Obenu ị teke bụ ị mu -nọ ndzụ ị mgboko-a bẹ mu a-kakwa ojetaru Kuráýisutu ozi. Ọo ya bụ ị mu ta madu ọphu mu a-hata. <sup>23</sup> Ụzo iphe labụ ono bẹ mu vudo l'echi; yọ tuko alọ mu ibe ẹka ẹbo-ẹbo. Obenu l'ọphu agụ mu agushi mu ike bụ tẹ mu lakfube Kuráýisutu tẹ mu l'iya nọdu. Onanu ka mu mma ugbo olemole. <sup>24</sup> Obenu l'ọ kwa l'okfu ẹhu nk'unu b'ọ kfubekpo karu unu mma tẹ mu nọdu ndzụ; swiru unu. <sup>25</sup> Keshinu ọphu iphe ono doru mu ẹnya bẹ mu maru ị mu a-nọdu-a ndzụ; swiru unu l'unu ha; yetajeru unu ẹka t'ẹhu-ọtso-ẹna unu kafua nshinu; bụ iya bụ ẹhu-ọtso-ẹna, shi l'eworu, unu woru onwunu ye Kuráýisutu l'ẹka. <sup>26</sup> Ọo ya bụkwanu; teke mu l'unu nọlephu; unu akafuaru onwe iphe unu a-gbabẹ ọkpa gude mu anga; keshinu mu l'unu tuko bụru ndu ẹphe ị Kuráýisutu tūgbaberu bụru nanu.

<sup>27</sup> Iphe lanu ọphu bụ ọkpobe iya aburu t'unu mejekwaphu umere, gbaru onye anu ozi-oma Kuráýisutu ono; k'ọphu bụkwanu teke mu du ike bya nk'unu; m'ọ bụ ị mu ta duhedu ike abyabya; mu anulee ọtu-ọnu unu: l'unu vudoshia ike; uche aburu unu nanu. Mu anukwaphu l'unu gude obu lanu ehe onwunu; l'ese kẹ ekwekwe ono, unu kweru ono, bụ l'ozi-

oma ono b'o shi. <sup>28</sup> Unu be kwekwa t'o nweru iphe ndu okfu unu e-gude eye unu egvu lẹ phuu. Onanu bebekpokwa buru iphe e-koshi ephe l'oo ephebedua e-mekochaa laa l'iyi; unubedua aburu ndu aa-dzota. Yo buru Nchileke a-tuko iya mekota. <sup>29</sup> L'unubedua be Nchileke mewaru eze-iphe-oma. Eze-iphe-oma ono ta bulekwa t'unu woru onwunu ye Kuráyisutu l'eka. O bukwapu t'unu gude k'okfu ehu iya jejee iphe-ehuka. <sup>30</sup> Nta-a be mu l'unu gbaakwa mgba alu ogo ono, mu shihawa alu ono, bukwa iya pu be mu alu nta-a. Teke ono, mu shi alu iya ono be unu gude enya unu pu ya; ole nta-a be unu anuwa iya le nchi.

## 2

### *Qmuta eka Kuráyisutu*

<sup>1</sup> Oo ya bu; eworu ono, unu woru onwunu ye Kuráyisutu l'eka ono; ?o meru; obu esihu unu ike to? Obu ono, o yeru unu ono; ?oodeje unu ike? Unu le Ume-du-Nso; ?unu tugbaberu-a buru nanu to? ?Unu anodejee emeru ibe unu obu-oma; l'aphukwaruphu ephe imiko? <sup>2</sup> Oo ya bu t'unu mee t'ehu-otso-ena mu dzua oke. Ege unu e-shi mee ya bu te egomunggo buru unu nanu; n-yemobu unu aburu nanu; obu unu; me uche unu abukwaruphu nanu. <sup>3</sup> Unu ba akpajekwa enya l'iphemiphe obule, unu eme ememe. Unu te ekuje onwunu iphe unu ta hadu l'o bu iya. Unu wozitaje onwunu ali l'eke ibe unu no; k'ophu onyenonu e-wotaje iya l'onye odo ka iya. <sup>4</sup> T'e b'o dukwa l'unu ha, onye bulephu

t'ò dūru iya lẹ mma bẹ ọo-nọduje acho nkinyi iya. T'onyenonu chojekwa iphe a-duru ndu ọdo lẹ mma. <sup>5</sup> T'uche unu yẹle kẹ Kuráýisutu Jisọsu bujeleruphu iphe lanu.

<sup>6</sup> Lẹ Jisọsu shikpelephu lẹ mbu du l'ọ bu Nchileke. Adudu ono, ọ du l'ọ bu Nchileke ono te nwekwa teke ọ rijeru lẹ yẹle Nchileke ha; m'ọ kwanu l'ọo iphe ya te eswefukwadu ẹnya.

<sup>7</sup> Iphe o mechiary bu l'ọ chiru obu iya; swee ẹnya l'onodu iya; bya aburu nwozi; a mua ya. Yọ buru madzu; bya anọo ndzu lẹ mgboko-a l'ọ bu ayibedua.

<sup>8</sup> Yọ nuaru Nchileke okfu; wozita onwiya ali. Yọ nu-taberu iya okfu ono; k'ọphu o kwetaru; nwuhu; Bu iya bu anwuhu ono, ọ nwuhuru l'oshi-osweru ono.

<sup>9</sup> Ọo ya meru iphe Nchileke wolikwanuru iya oreke-imeli: Yọ kakota iphemiphe ọbule. Yọ bya anu iya epha, kakota nu l'iphe bu epha;

<sup>10</sup> k'ọphu iphemiphe ọbule, nọ l'imigwe; ọphu nọ lẹ mgboko-a;

mẹ ọphu nọ lẹ mkpuli alì  
 a-bùru:  
 ẹphe -nùlẹphu ẹpha iya ono;  
 ẹphe ebyishi ikpere; baaru iya ẹja;

<sup>11</sup> mẹ k'ọphu madzù kpamukpamu  
 e-kfu l'edzudzu ọha l'ọo  
 Jisọsu Kuráyisutu bụ Nnajiufu;  
 shi ẹge ono kwabẹ  
 Nchileke, bụ Nna ugvu.

### *Ọbu iphoro l'ọchi mgboko-a*

<sup>12</sup> Ọo ya bụ; ndu mu yeru obu; teke ono, mu l'unu shi nọdu ono bẹ unu shi anujeleru mu phụ okfu. T'ẹ b'ọ bụlẹkwaphu teke mu l'unu nọ bẹ unu a-nujeru mu okfu nkinyi iya. Unu kafukwaaru mu ru ọnuru okfu nta-a, mu nọ unu ote-ẹnya-wa. Unu gude ọtsu-egvu; mẹ ẹhu-anmanma; kebe ẹhu meje t'adzọdzo ono, Nchileke dzọru unu ono ba bụ iphe mmakanu.

<sup>13</sup> L'ọ kwa Nchileke bẹ bụ onye ereshi ire ike l'ẹhu unu. Ọo ya emeje t'unu chĩa idzu ome iphe dū iya mma l'obu; bụkwaru iya phụ emeje t'unu dū ike mekota iya ẹge ọ tūberu.

<sup>14</sup> Iphemiphe ọbule, unu eme ememe; unu ba agujekwa aphụ eme iya; unu ta alojeru ntutego ye iya; <sup>15</sup> k'ọphu unu a-bù ndu ẹ-te nwedu iphe uta, aa-phuta unu l'ẹhu. Unu aburu ndu obu iphoro; bụkwaruphu unwu Nchileke; ndu ẹ-ta dudu iphe ẹphe gude merushia onwẹphe l'ejo ọgbo-wa, egomunggo swehuru-wa. Ọgbo-wa bẹ egomunggo swehuru; ẹphe adu-tabe ẹji;

k'ophu ephe atso age. T'o buru ege mkpo-kpodo anoduje echi l'enyashi; bu ege unu a-bu iphoro; l'echiru ndiphe le mgboko-a; <sup>16</sup> me unu -gude okfu ono, anu ndzu ono ewokfube ephe. Unu -emewa ege ono; oo ya bu le mu nwewaru iphe mu e-gude eku onwomu mboku ono, Kuráyisutu a-bya odo ono; keshinu ophu oso ono, mu gbaeberu le mu ezi ozi-oma ono ta buhedu mu oso iphoro; akanya ono, mu seeberu ono ta buhe mu nsegbu akanya.

<sup>17</sup> Mu vudo l'ifu Nchileke nta-a l'o bu onye achiru Nchileke aja; gude eworu, unu woru onwunu ye Nchileke l'eka; mee t'o buru aja, mu achu anu Nchileke. E to dukwa m'o -ruhuru e je ewota mee mu; gbashifua l'eli aja ono; mbu; o -buru le mu a-nwuhufua anwuhu l'okfu ehununu; be ehununu a-nodulekwaa atso mu ena; mu l'unu atukolee ete eswa. <sup>18</sup> T'o bukwaruhu ege ono be ehununu a-nodu atso unu ena; unu etsoru mu tee eswa.

### *Tímoti; me Epafurodayitosu*

<sup>19</sup> Mu arikuwa le mu ta anohedu anono nta-a; mu ezi Tímoti t'o bya agbaphee unu. Mu wookwaru iphe ono ye Nnajiufu, bu Jisusu l'eka; le mu e-zi iya t'o bya; k'ophu oo-je; lakfuta mu; bya akooru mu ege unu eme ala; shi ege ono dua mu ike. <sup>20</sup> E to nwehekwa onye odo, mu nweru, du l'o bu Tímoti, bu onye oriri ehununu echije ehununu. <sup>21</sup> Ndu ophu l'ephe ha bulekwapu oriri ehununu ephe echije ephe ehununu; ephe ta aru-vujehakwa iphe ophu buwa ke Jisusu Kuráyisutu l'oriri. <sup>22</sup> Obenu le Tímoti be unu



mawaru-a l'o koshiwaru ɛ ya bu onye gbaru t'e gude ire iya ɛka. Unu mawaru-a ɛge o shi tsopheta mu l'ò bu ɛge nwata anòduje etsophe nna iya. ɛge ono b'o shi tsota mu; l'eyeru mu ɛka l'ozi ozi-oma-wa. <sup>23</sup> Oo ya be mu ari ɛ mu e-zi Tímoti nk'unu ɛgwegwa-a; me mu -maleruphu ɛge oo-mekochaa mwaru mu. <sup>24</sup> Temanu be mu gudekwaphu Nnajiufu ɛka ɛ mu ta anòhedu ɔdu; mu abya agbaphee unu l'ishi onwomu.

<sup>25</sup> Mu rikwaruphu l'ɛ to nwedu ɔzo ɔdo, mu e-shi iya ɔdo; gbahaa te mu zi nwanna ayi Epafurodáyitosu t'ò byakfuta unu. Epafurodáyitosu bukwapu onye mu l'iya tukò eje ozi; bukwaruphu onye mu l'iya tukò alu ɔgu ɛhu Kuráyisutu; bukwaru iya pu bu onye ono, unu ziru t'ò wotaru mu iphe ono, mkpa iya shi duru mu ono. <sup>26</sup> Mu e-zi iya t'ò bya nk'unu t'unu l'iya jia; okfu l'obu unu l'unu ha be shiwa teke teru ɛnya duta iya; mbu; yo shiwa teke teru ɛnya tsuta iya l'ɛhu; l'e kfulu unu l'ɛhu te shidu du iya mma. <sup>27</sup> O shikpokwaa daburu l'iphe-ememe loswiya; mbu iphe-ememe, phoduru nwa gengu: m'o gbua ya. Obe Nchileke phuru iya imiko. E to bulekwa ya b'ò phuru imiko ono nwenkinyi iya. O phukwaru iya pu mbedua; ɔ buru abu me aphu atso mu ntsoto. <sup>28</sup> Oo ya bu l'o gbe ka mbedua ohe uhere te mu zikebe iya t'ò bya t'unu l'iya jia; k'ophu ɛhu atsokwanu unu ɛna l'unu gude ɛnya unu phua ya ɔdo; mbedua agbabuhukwanu mgbamuche iya agbabuhu. <sup>29</sup> Oo ya bu; t'unu gudekwa ɛhu-otso-ɛna gbobe ɛka labu; nata iya l'ò bu nwanna, unu l'iya me Nnajiufu tukòru tugbabe buru

nanu. Unu akwabeje ndu du l'ò bu iya ugvu; <sup>30</sup> l'ò phòdukwaru nwanshì mē ishi iya abaa l'ojeru Kuráýisutu ozi. Yo swee ẹnya lẹ ndzụ iya; l'emere mu iphe unu gẹga anòdu emeru mu ndege unu te buru ote-ẹnya.

### 3

#### *Ọkpobe odobe-ẹka-ndoo*

<sup>1</sup> Ẹke mu a-sùberu iya unu ishi; unwunna mu; aburu t'unu teje ẹswa l'unu lẹ Nnajiufu tugbaberu buru nanu. Odephu iphe mu dehawaru azu ta atsukwa mu l'anu. Mu e-dephu iya azu. Ishi iya aburu l'oo-me t'unu kafua ogude ẹka l'iphe ono, mu kfuhawaru unu ono. <sup>2</sup> Unu zelajekwaru ndu ono, ezije ejo iphe ono; mbu ndu ono, bugbaa nkuta-iphura phe ono; mbu ndu ono, ezije t'e gude iphe bua anu-ẹhu; su l'oo egbe ugvu, madzu bufutaje ndono. <sup>3</sup> Iphe mu gude ekfu iphe ono bu l'oo ayibedua be buru okpobe utsu; mbu ayibe ndu ophu gude Umedu-Nso l'abaru Nchileke aja. Ayi anoduje aja Kuráýisutu Jisusu ajaja ke iphe o meru ayi; mbu; e to bukwa l'ayi edobeje obu l'oo egbe madzu, ayi bu be a-dzo ayi. <sup>4</sup> Ndege o keru ama t'a su l'oo egbe madzu, onye bu l'adzotaje iya; me mu asu l'ò bu mbedua gage enwe iphe mu a-dzobe okpa; su l'oo egbe madzu, mu bu be a-dzo mu nu. O-buru l'o nweru onye arì lẹ ya nweru iphe ya a-dzobe okpa; dobe obu l'oo egbe madzu, ya bu a-dzo iya be mbedua kakwa onye obu enwenwe iya. <sup>5</sup> Okfu lẹ mu noleruphu abali ẹsaa k'ophu a muru mu; ke ẹsato iya; e bua mu utsu. A muru

mu; mu aburu nwa Ízurelu gèdegede. Ikfu, mu shi bu ikfu Bénjaminu. Mu bu onye Híburu; mbu okpobe nwa, ndu Híburu muru. A -bya le k'odobe ekemu ndu Ju be mbedua l'onwomu shi buru onye Fárisii. <sup>6</sup> Teke a byaru l'iphe bu iya shi kakota mu ophú l'obu; mu asu l'iphe mu shi eme, shi kakota mu ophú l'obu bu le mu bu onye shi achi nta chochi. A -bya le k'iphe ono, bu iphe ekemu kfu; su l'oo onye meru iya nu; onye ono aburu onye doberu aka ndoo ono be to nwekwa ophu aata mu uta l'oo ophu mu mesweru. <sup>7</sup> Obekwanu l'iphemiphe obule ono, bu iphe mu shi anoduje ari l'oo iphe abaru mu uru ono be mu gudeekwa okfu ehu Kuráiyisutu swefukota enya; guru iya ye l'iphe bu mu o-la-l'iyi. <sup>8</sup> E to bulekwa ono nkinyi iya. Iphemiphe obule odo be mu toko gukota; yo buru mu o-la-l'iyi. Ishi iya aburu l'uru, ophu nyiberu otu onu iya be rubewaru mu aka; bu iya bu le Kuráiyisutu Jisusu ono, bu Nnajiufu mu ono be mu mawaru majia ya enya. O bu l'okfu ehu iya be mu gude swekota enya l'iphemiphe obule, mu nweru enweru; t'o buru iphe iyi yitaru. Iphemiphe obule ono dukotawa mu l'o bu ntuekporu l'enya; k'ophu oo-bulephu Kuráiyisutu be bu uru, mu e-rita nkinyi iya; <sup>9</sup> me k'ophu mu ekoshikwanu le mu l'iya kwataakwanua tugbabe ogbodo atugbabe buru nanu. Oo ya bu l'iphe mu eme ta bukwa te mu meje t'a su le mu bu onye doberu aka ndoo; mbu egbe odobe-aka-ndoo ophu bu l'ome iphe ekemu kfu b'o shi. Odobe-aka-ndoo ophu mu ekoshi le mu doberu nta-a bu ophu shi l'ewota, mu wotaru

onwomu ye Kuráýisutu l'ẹka. Yọ bọru onanu bu odobe-ẹka-ndoo ọphu shi Nchileke l'ẹka. Ọ bụlekwaphu ndu woru onwẹphe ye iya l'ẹka bẹ ọoguje lẹ ndu doberu ẹka ndoo. <sup>10</sup> Iphe meru iphe mu swekotaru ẹnya l'iphe ono, mu nweru ono l'ọ ha; guru iya ye l'iphe iyi yitaru bu k'ọphu mu a-maru Kuráýisutu; maru ike ono, o gude shi l'ọnwu teta nọdu ndzụ ono; mẹ tẹ mu lẹ Kuráýisutu tuko gbaru mgba l'iphe-ẹhuka ono, ooje ono; mẹ tẹ Nchileke mee mu tẹ mu dọ l'ọ bu Kuráýisutu l'anwụhu ono, ọ nwụhuru ono; <sup>11</sup> k'ọphu Nchileke e-meru mu iphe mu ele ẹnya iya: mbụ mee mu tẹ mu shi l'ọnwu teta nọdu ndzụ.

### *Ọgba ọso ala l'ẹke, a tọberu*

<sup>12</sup> Iphe mu ekfu ta bukwa l'o ruwaru mu ẹka; ọdudu bọru lẹ mu dukotabebewa mma. Obenu l'iphe mu anọduje eseshi ike; bu tẹ mu nata obunggo ọso, mu gbaru; okfu lẹ Kuráýisutu Jisọsu natawaru mu; mee mu tẹ mu bọru nk'ia. <sup>13</sup> Ụnwunna mu; mu te ekfukwa lẹ mu natawaru obunggo ọso ono. Obenu l'ọ bu iphe lanu; bẹ mu emeje: mu atukoje iphe ọphu mu ghawaru ye l'azụ; zahashia; kebekpelephu ẹhu agba agbakfube ọphu nọ mu l'uzo ifu. <sup>14</sup> Mu anọduje ese; tẹ mu gbafu ọso ono l'ishi; k'ọphu mu a-nata obunggo, tso iya nọ. Obunggo ono bu ndzụ gbururu jeye ono, Nchileke shi l'ẹka Kuráýisutu Jisọsu; kua mu tẹ mu bya anata ono.

<sup>15</sup> Ọo ya bu; t'iphe bu ndu, agu onwẹphe eye lẹ ndu tsefutawaru l'ẹnya Nchileke; t'ọ

bulekwaruphu iphe ono, mu arị ono bẹ ẹphe a-nọduje arị. Ọ -buru l'o nweru ẹge ọ bya adu; unu aharu arị iphe ọdo bẹ Nchileke e-koshikwa iya-a unu; yo doo unu ẹnya. <sup>16</sup> Ọo ya bu; unu t'ayi tsolekwaruphu ọzo ono, ayi shihawa tsota ono; mbu ọzo, bu iya bẹ ayi tsoru gbabewa ọso ono ẹke, ayi gbaberu iya nta-a.

<sup>17</sup> Ụnwunna mu; unu tuko l'unu ha meje ẹge mu eme. Ayi ekoshikwa unu iphe unu e-meje. Unu tuko l'unu ha muta umere ndu ono, eme iphe ono, ayi ekoshi unu ono. <sup>18</sup> Mu kfuhaakwaru unu iphe-a ugbo olemole; nta-a bẹ mu gudekwa ẹnya-mini ekfuphuru iya unu azu; su: l'o nwekwaru igweligwe ndu umere ẹphe ekoshi l'ẹphe bu ọhogu oshi-osweru ke Kuráýisutu. <sup>19</sup> Ẹge ọo-muru ẹphe bu l'ẹphe alakota l'iyi. Iphe ẹphe abaru ẹja bu iphe a-la ẹphe l'ẹpho. Yọ buru iphe-iphere iya ga aduje ẹphe; bẹ ẹphe egudeje eku onwẹphe ekuku. Yọ bu leruphu l'iphe ke mgboko-a bẹ ẹphe woru obu tukobe. <sup>20</sup> A -bya abya l'ayibedua bẹ eze-ufu ayi nokwa l'imigwe. Ọ bu l'ẹke ono bẹ Onye Ndzota ono, ayi ele ẹnya iya eleshi iya ike ono e-shi bya; bu iya bu Nnajiufu ayi, bu Jisosu Kuráýisutu. <sup>21</sup> Ọo ya bu onye a-gbanwe ugwehu ayi ọwaa, ẹ-te nwedu iphe ọ bu-wa; mee ya t'ọ du l'ọ bu ugwehu nk'iya, l'egbu nwijinwii. Ike, oo-gude mee ya bu ike ono, o gude mekota iphemiphe ọbule; ẹphe atuko nọdu iya le mkpuli ono.

## 4

*Ọdu, Pọlu adu ndu ke Kuráýisutu*

<sup>1</sup> Ụnwunna mu, mu yeru obu; ọọ ya meru iphe mu sụru unu t'unu vudoshia ike l'atụgbabe, unu lẹ Nnajiufu tughaberu buru nanu. Obu unu egbukwa mu egbugbu. O bu unu emeje; ehu atso mu ena; bukwaruphu unubedua be bu iphe ekoshi lẹ mu mekputawaru. Mu yeru unu obu nshinu.

<sup>2</sup> Mu arọ unwunna labu ono, bu iya bu Yuwodiya yele Sintiki t'obu buru epe nanu; keshinu epe lẹ Nnajiufu tughaberu buru nanu.

<sup>3</sup> Mu arokwaphu nggubedua, bu ogbodo onya mu, mu lẹ nggu tukoru eje egbe ozi lanu ono; su t'i yejeru unwanyi ono eka t'epe meje iphe ono, mu suru t'epe me ono. Lẹ mu l'epe tukokwa eseshi akanya ozikashi ozi-oma ono ike; me Kelementi; mewaru ndu odo, butsua ndu, ayi l'epe eje ozi ono, bu ndu epha epe nokota l'ekwo, Nchileke deshuru epha ndu, a-no ndzu gbururu jeye.

<sup>4</sup> T'ehu tsojekpelekwaphu unu ena l'unu lẹ Nnajiufu tughaberu buru nanu. Te mu kfufukwaa ya phu odo: t'ehu tsojekpelekwaphu unu ena.

<sup>5</sup> Unu gudeje umere unu koshi ndiphe l'unu bu ndu obu-oma. Nnajiufu nokwa ntse. <sup>6</sup> T'e b'o dukwa iphe, unu e-je ochi obu l'eka. Iphe unu e-mejehia bu t'unu kfujeru nu Nchileke; kajuera iya iphemiphe obule, mkpa iya duru unu. Teke unu ekfu anu iya; unu etukwa iya phu epha. <sup>7</sup> Oo ya bu; ehu-agu ke Nchileke, bu iphe kariru ege madzu e-gude uche maru iya aburu iphe e-wota obu unu; me uche unu; kwachia l'atughabe, unu lẹ Kurayisutu tughaberu buru nanu.

8 Èke mu e-jebile iya phu; unwunna mu; bu: t'iphe e-shitajelephu unu l'uche buru oriri ke iphe ono, bukota okpobe okfu ono; me iphe bu iphe gbaru ke t'e yeru iya ugvu; me iphe bu iphe vudo nhamunha; me iphe bu iphe e te merudu emeru; me iphe du mma l'anya; me iphe bu iphe onu wukoru l'o dukota mma; me iphe bu iphe, du ugvu; me iphe bu iphe aaja ajaja. 9 Unu meje iphemiphe obule ono, mu ziru unu ono; me ophu unu mutaru mu l'eka; me iphemiphe obule ono, unu nuru mu l'onu ono; me ophu unu gude enya unu phua l'ehu mu. Oo ya bu; Nchileke ono, emeje t'unu buru l'ehu-agu ono; eswikwanuru unu eswiru.

*Polu etu ndu Filipayi epha;  
k'ohuma, epe meru iya*

10 Te Nnajiufu lebukwaa eka; le nta-a be unu bya bya emewaru mu ohuma, koshiru mu odo l'unu nyatakpokwaduru mu-a keshinu ime teke ono. Unu ta maduru iphe ehu atso mu. Iphe mu ekfu ta bukwa l'unu ta anodujedu ekfu okfu ehu mu. O gbe bukwaru uzo te shidu aduje unu t'unu mee ya l'eka. 11 Iphe mu ekfu ta bukwa l'o nweru iphe uko iya duru mu; le mbedua mutaakwaru t'iphe mu nweru: ege o ha ege o ha; dzujeeru mu; m'o -ruhuduru o du mu idagha. 12 Mu maru ege aabujeru onye ejo-eka; maru ege aabujeru onye eka no. Iphe bu eke mu no; eke mu no; be iphemiphe obule ono mewaru mu; to nwehe iphe abujekwadu mu enya-aphapha: mbu le mu rijiru epho; odudu buru le mu ze egu; ?

mu nweru iphe-o; ?mẹ mu te nwe-o; mu anọ-kirishilekwaa. <sup>13</sup> E tọ dudu iphe mu ta adudu ike eme; kẹ l'ọo Kuráyisutu bu onye emeje tẹ ike k'ememe iya du mu.

<sup>14</sup> Obenu lẹ teke ono, mu nọ l'iphe-ẹhuka ono bẹ unu nweru obu-oma l'ẹke mu nọ; yetaru mu ẹka. <sup>15</sup> Tẹmanu bẹ unubẹ ndu Filipayi l'onwunu maru lẹ teke mu watakpooru ozi ozi-oma ono l'odungu; mbu teke ono, mu shi lẹ Masedóniya lufuta ono b'ẹ to nwedu chochi odo, mu l'ẹphe tugbaberu nanu odo; gbahaa unubedua nwenkinyi unu. O bu unubedua nwenkinyi unu bu ndu shi anuje mu iphe; bukwaruphu unu bu ndu shi anataje iphe shi mu l'eka. <sup>16</sup> Mbụ je akpaa lẹ teke mu shi nodu lẹ Tesalonáyika bẹ unu shi emejeru mu mkpa mu; mẹ mkpa -byaru mu; mbu; ẹ tọ bulekwa a ugbo lanu bẹ unu meru mu iya nkinyi iya. <sup>17</sup> E tọ bukwa iphe ono, unu anuje mu ono bu iphe mu ele ẹnya iya. Iphe mu gbe ele ẹnya iya kwa t'uru byaru unu berebere; bu iya bu t'unu kafua oshihu ike l'eworu ono, unu woru onwunu ye Kuráyisutu l'eka ono. <sup>18</sup> Mu natawaru iphemiphe obule ono, unu nuru Epafurodayitosu t'o wotaru mu ono. Iphe ono, unu nuru mu ono bẹ unu nukwaru mu nugharu mu iya ẹka. Oo-dzukpokwaa iphe mu eme iya; tsufu etsufu. Iphe ono, unu nuru mu ono du l'ọ bu ngweja, eshi kwekwekwe, mkpo iya ekpo tuu alakfube Nchileke. Mkpọ iya ono atso Nchileke ẹna; yo gbobe ẹka labu; nata iya ohuma. <sup>19</sup> Nchileke ono, mu ejeru ozi ono anukota unu iphemiphe obule, mkpa iya duru



unu. O bu l'eka Kuráyisutu Jisosu be ooshije hata iphe nu ayi; mbu iphe ono, o nweru ono, bu odu-biribiri iya, kariru otukota onu iya ono; woru nu ayi. <sup>20</sup> T'o bu Nchileke ono, bu iya bu Nna ayi ono be ajaja a-bu nk'iya gbururu jeye le tutu yoyo. Ono kwa ege o du.

*Ekele mkpo-chi ishi iya*

<sup>21</sup> Unu jiaru mu iphe bu ndu ke Nchileke l'ehu l'ehu; mbu ndu ono, ephe le Kuráyisutu Jisosu tugbaberu bu nanu ono. Unwunna ayi, ndu ophu mu l'ephe no l'eke-a ajikwaphu unu.

<sup>22</sup> Iphe bu ndu ke Nchileke, no l'eke-a l'ephe ha ajikwaphu unu; ketekete ke ndu ejeru eze, bu Síza ozi.

<sup>23</sup> Te Nnajiufu, bu Jisosu Kuráyisutu meeru unu eze-iphe-oma l'unu ha.

**Bayiburu Ikwo**  
**Ikwo: Bayiburu Ikwo Bible**

copyright © 2014 Wycliffe Bible Translators, Inc.

Language: (Ikwo)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

3867ef4e-3384-5ab4-a937-63476bb8a7bb